



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

DREJTORIA PËR TË DREJTËN E INFORMIMIT

Nr. 1571 / Prot.
2

Tiranë, më 26 /12/2017

VENDIM

Nr. 103, datë 26/12 /2017

PËR

URDHËRIMIN E AUTORITETIT PUBLIK

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 "Për të drejtën e informimit", shkronjës a) të nenit 31/1 të ligjit nr. 9887 datë 10.03.2008 "Për mbrojtjen e të dhënave personale" i ndryshuar, Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi Z. ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim quajtur "Komisioneri") ankesën nr. 1571 Prot., datë 06.12.2017, ndaj Autoritetit Publik "Drejtoria Arsimore Rajonale Durrës" (në vijim quajtur "Autoriteti Publik"), me objekt "Ankim ndaj refuzimit për dhënie të informacionit dhe kopje të dokumenteve zyrtare".

Ankuesi, me shkresën e datës 06.10.2017 ka kërkuar nga Autoriteti Publik t'i vihet në dispozicion informacioni dhe dokumentacioni si më poshtë:

1. A ka kryer DAR Durrës gjatë këtyre tre viteve një studim në lidhje se sa i përhapur është bullizmi si fenomen në shkollat 9-vjeçare dhe të mesme?
2. Sa është numri i psikologëve që punojnë në shkollat e qytetit dhe sa shkolla kemi në drejtimin tuaj?
3. Sa është raporti numër psikologësh me numër për nxënës?
4. A keni konstatuar raste kur puna dhe roli real i psikologut në shkollë ka qenë jo aktiv, madje i panjohur për nxënësit, të cilët në shkollë përballen me mjaft problematika, gjithashtu edhe me bullizmin?
5. A keni specifikuar llojet e bullizmit të hasura në shkollë dhe çfarë mesazhe janë marrë për të trajtuar ato në mënyrë sa më të mirë?

Pas refuzimit të dhënies së informacionit nga Autoriteti Publik, ankuesi kërkon nga KDIMDP, ushtrimin e kompetencave që i njeh ligji për rastet e refuzimit të dhënies së informacionit si dhe urdhërimin e dhënies së informacionit/dokumentacionit nga Autoriteti Publik.

Me shkresën nr. 1571/1 Prot., datë 12.12.2017, Komisioneri ka kërkuar të trajtohet kërkesa dhe të vlerësohet dhënia e informacionit të kërkuar brenda datës 19.12.2017. Megjithëse ka kaluar afati i përcaktuar për dhënien e informacionit, Autoriteti Publik nuk ka kthyer përgjigje.

Pas shqyrtimit të ankesës, kërkesës për parashtrime, si dhe konsultimit të legjislacionit përkatës rezulton se, informacioni i kërkuar përmbush kërkesat e pikës 2, të nenit 2, të Ligjit nr.119/2014 “Për të drejtën e informimit”, i cili përcakton se: *“Informacion publik” konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik”.*

Autoriteti Publik nuk ka përmbushur detyrimet e përcaktuara në nenin 15 të Ligjit nr.119/2014 “Për të drejtën e informimit” (në vijim quajtur “Ligji për të Drejtën e Informimit”). Bazuar në nenin 15 të Ligjit Për të Drejtën e Informimit, Autoriteti Publik trajton kërkesën për informim, duke parashtruar informacionin e kërkuar sa më shpejt që të jetë e mundur, por jo më vonë se 10 ditë pune nga dita e dorëzimit të saj, përveç rasteve kur ligji i posaçëm parashikon ndryshe.

Bazuar në pikën 3 të nenit 3 të ligjit sipërcituar, *“Çdo person ka të drejtë të njihet me informacionin publik, nëpërmjet dokumentit origjinal ose duke marrë një kopje të tij në formën ose formatin që mundëson akses të plotë në përmbajtjen e dokumentacionit”.*

Bazuar në pikën 1 të nenit 14 të po këtij ligji parashikohet se *“Të gjitha kërkesat për informacion trajtohen, si rregull, nëpërmjet konsultimit pa pagesë të informacionit në mjediset e autoritetit publik, apo, kur është rasti, nëpërmjet faqes zyrtare të autoritetit publik në internet”.*

Për sa më sipër konstatohet se Autoriteti Publik nuk e ka përmbushur detyrimin për të informuar kërkuuesin.

Theksojmë, se e drejta për t'u informuar është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

Në këto kushte, në lidhje me ankesën e Z. ndaj Autoritetit Publik “Drejtoria Arsimore Rajonale Durrës”, Komisioneri vlerëson se ankesa është e bazuar në ligj dhe si e tillë ajo duhet pranuar.

PËR KËTO ARSYE

Bazuar në shkronjat b) dhe ç) të pikës 5, të nenit 24, nenit 25 të ligjit nr.119/2014 “Për të drejtën e informimit”, shkronjën a) të pikës 1 të nenit 18, të ligjit nr. 49/2012

“Për organizimin dhe funksionimin e gjykatave administrative” dhe gjykimin e mosmarrëveshjeve administrative”,

V E N D O S A :

1. Pranimin e ankesës së Z. _____, Nr. 1571 Prot., datë 06.12.2017, ndaj Autoritetit Publik/ Drejtoria Arsimore Rajonale Durrës, me objekt “Ankim ndaj refuzimit për dhënie të informacionit dhe kopje të dokumenteve zyrtare”.
2. Urdhërimin e Autoritetit Publik/ Drejtoria Arsimore Rajonale Durrës për vënien në dispozicion të informacionit / dokumentacionit të kërkuar, konkretisht:
 - A ka kryer DAR Durrës gjatë këtyre tre viteve një studim në lidhje se sa i përhapur është bullizmi si fenomen në shkollat 9-vjeçare dhe të mesme?
 - Sa është numri i psikologëve që punojnë në shkollat e qytetit dhe sa shkolla kemi në drejtimin tuaj?
 - Sa është raporti numër psikologësh me numër për nxënës?
 - A keni konstatuar raste kur puna dhe roli real i psikologut në shkollë ka qenë jo aktiv, madje i panjohur për nxënësit, të cilët në shkollë përballen me mjaft problematika, gjithashtu edhe me bullizmin?
 - A keni specifikuar llojet e bullizmit të hasura në shkollë dhe çfarë mesazhe janë marrë për ti trajtuar ato në mënyrë sa më të mirë?, brenda datës 8.01.2018
3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijeni e këtij vendimi, sipas nenit 25 të ligjit nr.119/2014 “ Për të drejtën e informimit”.
4. Ky vendim u dha sot në datë 26.12 .2017.

